



佛說佛醫經

吳沙門竺律炎共支越譯

惟日雜難經

吳優婆塞支謙譯

佛說佛醫經、惟日雜難經



清刻龍藏佛說法變相圖

二經同卷

佛說佛醫經
惟日雜難經

明十

佛說佛醫經

明十

吳沙門竺律炎共支越譯

人身中本有四病一者地二者水三者火四者風風增氣起火增熱起水增寒起土增力盛本從是四病起四百四病土屬身水屬口火屬眼風屬耳火少寒多目冥春正月二月三月寒多夏四月五月六月風多秋七月八月九月熱多冬十月十一月十二月有風有寒何以故春寒多以萬物皆生爲寒出故寒多何以故夏風多以萬物榮華陰陽合聚故

風多何以故秋熱多以萬物成熟故熱多何以故冬有風有寒以萬物終亡熱去故有風寒三月四月五月六月七月得卧何以故風多故身放八月九月十月十一月十二月正月二月不得卧何以故寒多故身縮春三月有寒不得食麥豆宜食秬米醍醐諸熱物夏三月風不得食芋豆麥宜食秬米乳酪秋三月有熱不得食秬米醍醐宜食細米麴蜜稻黍冬三月有風寒陽與陰合宜食秬米胡豆羹醍醐有時卧風起有時滅有時卧火起有時滅有寒起有時滅人得病有十因緣一者久坐不飯二者食無貸三者憂愁四者疲極五者淫泆六者瞋恚七者忍大便八者忍小便九者制上風十者制下風從是十因緣生病佛言有九因緣命未當盡爲橫盡一不應

飯爲飯二爲不量飯三爲不習飯四爲不出生五爲止熟六爲不持戒七爲近惡知識八爲入里不時不如法行九爲可避不避如是九因緣人命爲橫盡不應飯爲飯謂不可意飯亦謂不隨四時食亦爲已飯復飯是爲不應飯爲飯不量飯者謂不知節度多食過足是爲不量飯者不習飯者謂不時食若至他郡國不知俗宜飯食未習不稍稍飯是爲不習飯不出生者謂飯物未消復上飯若服藥吐下不盡便食來是爲不出生止熟者謂大便小便來時不即時行噫吐下風來時制是爲止熟不持戒者謂犯五戒現世間盜犯他人婦女者便入縣官或刺或死或得梟榜壓死若餓死或得脫外從怨家得首死或驚怖憂愁死是爲不持戒近惡知識者謂他人作

惡便來及人何以故不離惡知識故惡人不計當坐之是爲近惡知識入里不知時不如法行者謂晨暮行亦有魍魎諍鬪者若有長吏追捕而不避若入他家舍妄視不可視妄聽不可聽妄犯不可犯不可念是爲入里不知時不如法行爲可避不避者謂弊牛馬狡狗蛇蟲水火坑穽車馳馬拔刀醉人惡人亦餘若干是爲可避不避如是九因緣人命未盡爲盡黠人當識是當避是已避得兩福一者得長壽乃得聞道好語亦得久行道佛言有四飯一爲子飯二爲三百矛斫飯三爲皮革蟲生出飯四爲災飯子飯者謂人貪味食肉時便自校計念是肉皆我前世時父母兄弟妻子親屬亦從是不得脫生死已得是意便止貪是爲子飯三百矛斫飯者謂飯

隨味念復念其殃無有數能不念味便得脫又矛斫人爲亡身已生念復念有若干受苦爲三百矛斫飯皮革蟲生出飯者謂人念味亦一切萬物憂家中事便穿人意意作萬端爲出去是爲皮革蟲生飯災飯者謂一生死行皆爲災飯如火燒萬物人所行皆當來腦身劇火燒萬物故言災所以言飯者謂人所可意念人故言飯也人食肉譬如食其子諸畜生皆爲我作父母兄弟妻子不可數亦有六因緣不得食肉一者莫自殺二者莫教殺三者莫與殺同心四者見殺五者聞殺六者疑爲我故殺無是六意得食肉不食者有六疑人能不食肉者得不驚怖福佛言食多有五罪一者多睡眠二者多病三者多婬四者不能諷誦經五者多著世間何以故人貪婬

人知色味瞋恚知橫至味癡人知飯食味律
經說人貪味味復味復生不得美味佛言一
食者爲欲斷生死亦墮貪不能行道爲得天
眼自知所從來生去至何所人不念死多食
常念婦人皆墮百四十惡中天皆用飯故犯
十惡後生便失人形墮畜生中既得作人飢
渴血出瞋恚傍生於愛內生於貪佛說有大
福自飢以飯與人令人得命是爲大福後生
饒飲食之瞋恚亦無所施亦不得但意恣貪
婬亦無所施但得意恣非我所有一錢以上
不得取故作貪欲空自若作罪道人^{明十}不有憂
愁憂隨怒愁隨貪我輩有死歲有死月有死
日有死時亦不知亦不畏亦不行道亦不持
戒東走西走憂銅憂鐵憂田宅奴婢但益人
惱增人苦爲種玄田生習佛言人治生譬如蜂

作蜜採取衆華勤苦積日已成人便攻取去
唐自苦不得自給人求是念是憂有憂無飢
渴勤苦合聚財物未死憂五家分或水火盜
賊縣官病痛多不如意已死他人得之身當
得其罪毒痛不可言五分者一者火分二者
水分三者盜賊分四者縣官分五者貧昆弟
分何爲無憂所有人不計是五分憂苦劇不
棄是憂苦有萬端結在腹中離道遠法人法
生價作得利不當喜不得利亦不當憂是皆
前世宿命所致人有貪貪便不得利正使得
一天下財物亦不能猛自用之亦不隨人去
但益人結但有苦惱但種後世緣因緣因如
火如火無所不燒我輩不覺是點不敢妄採
知爲增苦種罪

佛說佛醫經

明十

五